

02 AUGUST
RUGACIUNEA 1
SF.CUVIOS
VASILE DE LA MOSCOVA

МОЛИТВА

О, великий угодниче Христов, преблаженне Василие! Припадающе ко святей иконе твоей с любовию, с верою лобызаем честный твой образ, чающе от него силою Божиею получить исцеление душ и телес наших, прославляем величество Вседержителя Бога, Егоже ты душею и телом твоим в жизни сей прославил еси, ублажаем твердость веры и любви твоей ко Господу Саваофу, проповедуем крепость твоего духа и, воспоминающе великие подвиги добродетели твоя, вопием к тебе из глубины сердец наших: не премолчи вопити за ны ко Господу Богу, телом бо твоим пребываеши с нами на земли, духом же почиваеши на небеси во объятиих Зиждителя твоего. Предстательством убо твоим у Престола непроступная славы, испроси, да почиет и на нас Дух Божий, дух премудрости и разума, дух света и крепости, дух ведения и благочестия и

страха Божия, и да не презриши многогрешных наших молений. Се мы, предстояще в храме сем, восписуем ти похвальная сие: радуйся, Богоблаженне Василие, яко ты, возненавидев временная мира, Богоугодно подвижался еси и на высоту добродетели востекл еси. Радуйся, яко потщался еси победити страсть со всеми порочными ея склонностями и дарований Святаго Духа сподобился еси. Радуйся, яко в терпении и страдании храбр явился еси и вся стрелы лукаваго разженные погасил еси. Радуйся, яко желанием от источник израилевых всегда почерпая, благодати Божия преисполнен был еси. Радуйся, яко, взяв ярем спасительнаго словесе Христа Бога нашего, поправ еси всю гордыню мира. Радуйся, яко посреде молв безмолвие сохранил еси, мысль твою быстро устремляя к Горним. Радуйся, яко ты мечем духовным волю хотения твоего отседал еси и стопы разума твоего утверждал еси на камени любви Христовы. Радуйся, яко совлекся еси телесных одеяний и облекся еси в новаго человека, обновленнаго кровию Христовою. Радуйся, яко вместо тленных богатство духовное собрал еси и начатки трудов Христу Богу нашему принесл еси. Радуйся, яко и по смерти Господь яви тя нам источника исцелений. Радуйся, яко славы и богатства не восхотев, вся в ничтоже вменил еси, да Христа приобретаеши,

Егоже и стяжал еси многими труды и терпением. Радуйся, яко ныне, соединяся с Богом, непрестанным Его зрением наслаждаешься и обитаеши во блаженной вечности. Радуйся, яко насыщаешься благими, ихже око не виде, и ухо не слыша, и на сердце человеку не взыдоша, яже уготовал Бог тако возлюбившему Его, поспешествуй убо молитвами твоими, избранниче Божий, да и мы на земли, совокуплени крепчайшим любви Божия союзом, великодушно понесем благое Евангелия иго и благодатию Святаго Духа да сподобимся вкусити и насыщаться вечно с тобою Небесных немерцаемых благ. Аминь.